

Patu Costituenti de su Laboratòriu “CASTEDDU CITADI CAPITALI”

Is presentis assòtzius culturalis, organizatzionis *no profit*, cìrculus e movimentus polìticus, operadoris de sa cultura e de is fainas chi portant cumpetèntzias e funt espressioni de sa sociedadadi e de sa comunidadi casteddaja, sutascriint custu patu costituenti po sa creatzioni de su Laboratòriu “Casteddu Citadi Capitali”, cun s'obietivu de ndi donai vida e de ndi preni de ideas chi benint de is arrugas e de is bixinaus nostus – a traessu de unu processu inclusivu e identitàriu autònomu e differenti de is cricas de poderi traditzionalis de centru-dereta e centru-manca – a unu programa polìticu-aministrativu e a una coalitzioni cìvica chi potzant cumpeti a is eletzionis comunalis de su 2016. Is puntus culturalis, polìticus e de governu de importu prus mannu funt is chi sighint:

1 - S'Autonomia e su modellu de sviluppu suu ant acabau su ciclu insoru

Is polìticas de austeridadi europeas ant cumportau, in su cuntestu italianu, una centralizatzioni de s'organizatzioni de su stadu, chi arrefudat su princìpiu de sa soberania populari. In Sardìnnia sa fasi autonomìstica no at scìpiu sviluppai unu benèssiri chi arrennescèssit a durai in su tempu e fessit arrespetosu de is benis comunus de primu importu (solu, ària, àcua), mortifichendi is vocatzionis naturalis e is sabidurias pròpias de sa Terra nosta. Custu s'est verificau po nexi de is *élites* localis, chi no ant scìpiu o bòfiu donai arrespustas a is abisòngius de benèssiri e de paris oportunidadis de su Pòpulu sardu.

Duncas, pensaus chi siat acabada sa fasi de s'Autonomia e chi siat urgenti e necessàriu a ndi oberri unu processu culturali, sociali, econòmicu e polìticu nou chi donit speru e concretesa emancipadora a sa Sardìnnia. Faeus nostu su princìpiu de Autodeterminatzioni de su Pòpulu sardu e de sa Natzioni sarda, aici comentis sceberau de s'ONU e ratificau de sa Conferèntzia de Helsinki, e unu modellu de sviluppu sostenìbili, comentis elementus distintivus e valorialis de arreferimentu, aici chi potzat essi esercitau a totus is livellus polìticus e istituzionalis su princìpiu de soberania e de autogovernu.

Custu progetu e is valoris suus si ponit de manera ogetiva, in su pranu sociali, polìticu, econòmicu e culturali, in alternativa a is progetus espressaus e in cursu imoi etotu a livellu locali, sardu e italianu siat in su centru-dereta siat in su centru-manca, e de issu s'at a partiri po sa definitzioni de acordus e/o alliàntzias elettoralis, polìticas e istituzionalis.

A custu laboratòriu, duncas, aderint personas e organizatzionis chi tenint arrèxinis profundas in Citadi e in Sardìnnia, sogetividades de sa comunidadi e de rapresentàntzia de su territòriu chi tengant sa voluntadi e sa capacidadi de si sviluppai de manera plurali, inclusiva e identitària, cun mannària internatzionali e bisura euro-mediterrànea, cun connotaus fortis de indipendèntzia e de no-subordinatzioni orgànica e geràrchica a is segreterias e is diretzionis stràngias.

2 - Sa Citadi de Casteddu, intra de crisi sociali e carèntzias de su quadru istituzionali

In Casteddu, in is ùrtimus cuàturu annus (2011-2014) is bividoris funt calaus prus chi in su quadrienniu innantis (2008-2011). Is iscritus a is Centrus Servìtziu po su Traballu, sceti in sa Capitali, funt passaus de 29.700 (maju de su 2011) a 37.070 (mesi de idas de su 2014). Su tassu de disimpreu, de su 2007 a oi, est passau de s'11% a su 19%.

Sa falta, po responsabilidadi de sa Regioni, de unu quadru istituzionali certu impitzus de s'articolatzioni de is poderis sub-regionalis, e sa falta de una atzioni riformadora forti in su su governu de sa capitali, impari a sa renùntzia de su Sìndigu e de sa magioria cosa sua

de si ponni a sa conca de is Comunas sardas po contrastai is políticas governativas de *spending-review*, no ant permissu a sa Citadi de si ponni comentis sa locomotiva de unu progetu de svilupu sostenìbili nou, bonu po creai arretzas de comunus e citadis sardas e po ddas ponni in relata cun sa Regioni Autònoma de sa Sardìnnia e cun is processus de àrea manna de caràteri sub-regionali, acapius a s'eficèntzia e a s'eficàcia in sa gestioni e spartidura de is servìtzios e articolaus po cumpetèntzias e vocatzionis de is territòrios, segundu su princìpiu de adeguadesa e sussidiaridadi.

Tocat, duncas, a ndi donai boxi e rapresentàntzia a una bisura organizada e organizàbili, siat po s'arrescatu de una esistèntzia sinniada de sa poberesia, su disterru e sa solitùdini de cetus popularis mannus, siat po s'iniziadura positiva de fortzas imprenditorialis, intelletualis, de sa cultura e de is servìtzios, chi bolint cuncurri a sa creazioni de traballu e richesa difùndia orientada a finis socialis, in d-unu quadru de svilupu econòmicu sostenìbili e arrespetosu de s'òmini e de s'ambienti.

3 - Esercitai is prerogativas democràticas e de governu impitzus de sa soberania populari

Is eletzionis rapresentant unu momentu importanti, manca no esclusivu, po s'esercìtziu de is prerogativas impitzus de sa soberania populari. Cussas de Casteddu de su 2016 rapresentant unu momentu stràtègicu, poita ca cun s'eletzioni de su Sìndigu de sa Citadi capitali si detèrminant conditzionis ogetivas de arrolus e cumpetèntzias, siat po mori de sa Citadi metropolitana chi funt cuncordendi, siat po s'ogetiva urgèntzia – a legislatzioni vigenti – de una *governance* de is processus de una Àrea manna aundi oi ddoi bivint prus del 400.000 personas, in setoris comentis mobilitadi, impreu e pranificatzioni de su solu, polìticas comercialis, ciclu de is arrefudus.

Custu scenàriu istituzionali nou imposit unu esercìtziu forti, radicali e consapevoli de direzioni e coordinamentu istituzionali in cabu a su Sìndigu metropolitanu e, in su matessi tempu, unu esercìtziu de is prerogativas de alta aministrazioni e governu de s'esecutivu in s'arrespetu de s'arrolu de indiritzu, programatzioni e controllu de su Consillu Comunali, cun su cali depint essi coerentis is indiritzus generalis de governu, su cuncordu de is scèberus stràtègicus e de assetus in is Entis, in is Agentzias, in is sociedades a partecipazioni pùblica chi òperant in sa sanidadi, in s'istrutzioni, in is trasportus e in su crèditu.

4 - Costruiri su caminu Agenda 2019

Su progetu po Casteddu Citadi Capitali, po sa natura sua e po sa portata de is temas e de is arrolus de governu e de rapresentàntzia ogetiva, est una tapa decisiva de unu caminu prus generali chi defineus Agenda 2019.

Seus coscentis chi chena de traballu no ddoi est libertadi, e chena de autodeterminazioni in Sardìnnia no ddoi est esercìtziu beru de is poderis soberanus. S'atuali deriva neo-centralista e semi-coloniali andat cumbàtia cun sa costruzioni de una alliàntzia sociali, culturali, polìtica i econòmica, chi tengat fortza, capacidadi e intelligèntzia de imponni s'abertura, in sa sociedadadi sarda e in sa Regioni, de una stagioni polìtica, istituzionali e de governu noa po s'Autodeterminazioni de su Pòpulu sardu.

5 - Democratzia, partecipazioni e crisi de sa rapresentàntzia

Po mesu de custa proposta polìticu-culturali-istitutzionali e de governu boleus contribui, comentis citadinus s'ingulus o associaus, a sa debata impitzus de sa crisi de rapresentàntzia de is entis intermèdius e de is efetus lègius chi at prodùsiu i est producendi sa falta de logus de partecipazioni e arrexonu collettivu e su stesiamentu progressivu intra de governadoris e governaus, chi si furriant in tassus de astensioni de su votu mannus meda chi ponint in perìgulu su caràteri democràticu de su sistema, poita ca

agiudant a una concentratzioni alta meda de poderi in is manus de pagus, mancai sa rapresentàntzia e sa legitimatzioni populari insoru siant bàscias meda.

Su puntu de importu prus mannu no est s'unificatzioni eletoralìstica de indipendentistas, soberanistas e aicinarada “manca”, o de nci pesai murus ideològicus. Su chi boleus est a costrui una arrespusta de caràteri processuali, articolada e inclusiva, chi is Sardus dda potzant percepiri comenti una alternativa credibili.

Su valori donau a is interessus de sa Sardìnnia no depit essi prus subordinau a cussus de su stadu italianu. Custa ambitzioni e custu disafiu si ponint siat po su livelli aministrativu locali siat po su valori chi tenit po totu sa Sardìnnia. Boleus agiri innestendi formas profundas de democratzia comunidària, fintzas cumintzendi a imperai su mètudu de is primàrias po su scèberu de su candidau a s'indigu.

Afirmaus prìncipius èticus e de annoamentu fortis meda, chi bolint una coerèntzia forti intra de is scèberus programàticus chi ddoi funt in su concetu de sostenibilidadi e in su prìncipiu de autodeterminatzioni e is collocaduras polìticu-istitutzionalis, de oi e de cras, de totus is protagonistas chi imparis cun nosu ant a acetai custu desafiu.

Casteddu, 18 de làmpadas de su 2015